

INUIT ATAQATIGIIT INATSIARTUNI



UKA2024/123

24.10.24

Edvard Nielsen Aronsen

Pineqaatissinneqarsimasut tarnimikkut nappaatillit
paaqqutarineqartarnerat katsorsarneqartarnerallu
pitsaanerpaaffissaminniitinniarlugit aningaasatigut, allaffissornikkut
peqqinnissakkullu sulisunik nukissanillu qanoq qularnaarisinnaanitta
misissorneqarnissaa siunertaralugu nassuiaasioqqullugit
Naalakkersuisut peqquneqarnissaanik Inatsisartut
aalajangiiffigisassaattut siunnersuut. Nassuiaat UKA 2025
nallertinnagu Inatsisartunut agguanneqassaaq.

Inatsisartunut ilaasortaq Anna Wangenheim, Demokraatit

Oqaaseqaat:

Inuit Ataqtigiinniit tarnimikkut nappaatillit aammalu pineqaatissinneqarsimasut tarnimikkut nappaatillit ullumikkornit pitsaanermik sullinneqarnissaat suleqataaffigivarput. Ataatsimoorlutami akisussaaffigaarput, iliuuseqarneq eqeersimaartumillu isummersorneq aqqutigalugit ikioqtigiilluta Nunatsinni ajornartorsiutinut sakkortuunut peqqutaasut ikilisarnissaat. Soorluttaaq ukioq kingulleq novemberimi Peqqinnissamut tunngatillugu isumaqtigiissutigisatsinni sammisat tallimaattut inuit tarnimikkut napparsimasut pillugit suliniutissat inissinneqarsimasut. Matumani Inuit Ataqtigiinni tikkuarsimasarput tassaavoq inoqtigut tarnimikkut napparsimasut sullinneqarnerini oqartussaaffiit arlallit kalluarneqartarmata ass. soorlu kommuuni peqqinnissaqarfilla assersuutigalugit, taakkua akornanni suleqatigiilluartoqartariaqartoq. Inuit amerlanngitsunnguulluta oqartussaaffiit akimorliugit innuttaasut pillugit suleqatigiilluarnerusariaqartugut isumaqarpugut. Taamatuttaaq

INUIT ATAQATIGIIT INATSISARTUNI



isumaqatigiissutitta ilagaat Kalaallit Nunaanni tarnimikkut katsorsaasarneq ataatsimut isigalugu pilersaarusiortoqassasoq.

Taamaattumik Inuit Ataqatigiinniit qujarupparput tarnimikkut nappaatilinnut sullissinerup nukittorsarneqarnissaa aamma ineriartortinneqarnissaa Naalakkersuisut anguniarlugu maanna suliniuteqarmata, taamaalilluni innuttaasut eqqugaasut sapinngisamik pitsaanerpaamik atugaqarnissaat qulakkeerneqassammat.

Aammattaq Naalakkersuisut akissuteqaamminni suleqatigiissitat assigiinngitsunik suliaqartut aningaasaqarnikkut, allaffissornikkut, aamma tarnikkut nappaatilinnik sullissineq pillugu nassuiaatinit 2024-mi saqqummiunneqartunit atuutilersitsinissamik ukkataqartunut, suliniutinut ataasiakkaanut peqqissutsikkut suliaqarnikkut kingunerisassai pillugit erseqqissaasunik pitsanngorsaasunillu maannakkorpiaq iliuusissatut katalogimik suliaqartoqartoq taavaat. Taamatut suliaqartoqarnera Inuit Ataqatigiinniit qujarupparput kissaatigalugu tarnimikkut nappaatillit aammalu peqaatissinneqarsimasut tarnimikkut nappaatillit pillugit sullissinerup pitsaanerulerneranik tamanna kinguneqassasoq.

Soorunami qaquguluunniit sutigut tamatigut pitsanngorsaajuaannartussaavugut, aamma tarnimikkut nappaatillit sullinneqarnerat pillugu. Sulisussatigut unamminartorsiorpugut. Tarnimikkut nappaatillit pillugit sullissinermi ilisimasatigut annertusaasariaqarpugut, allaat inuiaqatigiit ilutsinni tarnimikkut nappaatilinnut isiginnittaaserput immaqqa allanngortittariaqarparput. Napparsimasummi tamarmik inuttut naleqassuseq aamma pigaat aammalu atungassarititaasut aallaavigalugit pitsaanerpaamik katsorsarneqarnissaq pisinnaatitaaffigaat. Sumilluunniit nappaatilinnut taanna atuppoq aamma tarnimikkut napparsimasunut.

INUIT ATAQATIGIIT INATSIARTUNI



Taamatut oqaaseqarluta qulaani pineqartut pillugit
nalunaarusiortoqareernikuunera aallaavigalugu Naalakkersuisut
allannguutissatut siunnersuutaata taparserneqarnissaa Inuit Ataqatigiinniit
inassutigaarput.